

आकाशवाणी जयपुर-अजमेर
प्रादेशिक समाचार
दिनांक : 16.02.2026 समय : 18.45 बजे

- खैरथल-तिजारा जिला रा एक कारखाना मांय लाय लाग जावण ऊँ आठ मजूरां री मौतं
- केंद्रीय इलेक्ट्रॉनिक्स अर सूचना प्रौद्योगिकी मंत्री अश्विनी वैष्णव कह्यो-खेती-बाड़ी, मौसम रा अंदाज अर जलवायु मांय बदलाव सरीखा हलकां मांय एआई मोटी तादाद मांय मौका दे रह्यो हैं
- राज्य सरकार प्रधानमंत्री फसल बीमा योजना रा तैत बीमा कंपनियां अर बैंकां री कथित गडबडियां री जांच एसओजी ऊँ करावेलां
- केंद्रीय माध्यमिक शिक्षा बोर्ड री ओर ऊँ लिया जावण वाळा दसवीं अर बारहवीं कक्षा रा इम्तिहान काल सरू व्हेलां

000

खैरथल-तिजारा जिला मांय टपूकड़ा रा खुशखेड़ा औद्योगिक हलका रा एक कारखाना मांय आज लाय लाग जावण ऊँ आठ मजूरां री मौत व्हे गयीं जिला प्रशासन अर पुलिस रा अहलकार मौके पूग र राहत रा काम सरू करायां प्रधानमंत्री नरेन्द्र मोदी, राज्यपाल हरिभाऊ बागडे अर मुख्यमंत्री भजनलाल शर्मा समेत केई हस्तियां हादसा माथे गहरो दुःख जताता थकां मरण वाळां रा पिरवार वाळां रा प्रति दुःख जतायो हैं वन मंत्री संजय शर्मा मौके पूग ग्या हैं वे बतायो के गत्ता बणावण वाळी ज्यीं फ़ैक्ट्री मांय ओ हादसो व्ह्यो, जठे गैर-कानूनी तरीका ऊँ पटाखा बणाया जा रह्या हां

वन मंत्री कह्यो के पूरा औद्योगिक हलका मांय गैर-कानूनी तौर ऊँ चाल रह्या कारखाना री जांच करायी जावेला, ताकि आगे ऐड़ा हादसा रोक्या जा सकें

केंद्रीय इलेक्ट्रॉनिक्स अर सूचना प्रौद्योगिकी मंत्री अश्विनी वैष्णव कह्यो है के भारत री तेजी ऊँ बधती रचनात्मक माली व्यवस्था देश रा मजबूत डिजिटल बुनियादी ढांचा अर कुशल लोगां रे पाण चलायी जा रही हैं वे आज नई दिल्ली मांय सरू व्ह्या एआई इम्पैक्ट समिट 2026 रा उपग्रह कार्यक्रम रा सत्र रे दौरान बोल रह्या हां श्री वैष्णव कह्यो के देश मांय करीब 90 फीसदी हिस्सा मांय 5-जी इन्टरनेट रो सुबीतो मुहैया करा दियो ज्यो हैं वे कह्यो के खेती-बाड़ी, मौसम रो अंदाजो लगावण, जलवायु परिवर्तन, नुवी सामग्रियां री खोज अर उत्पादकता सरीखा हलकां मांय ए.आई. रे जरिये मोटी तादाद मांय मौका मिल रह्या हैं पांच दिन रा ई सम्मेलन मांय ऑस्ट्रेलिया, जापान, रूस, ब्रिटेन, फ्रांस अर जर्मनी समेत 13 देशां रा मंडप बणायी ज्या हैं प्रदर्शनी मांय परदेस ऊँ आया नुमाइन्दां समेत अढाई लाख ऊँ बत्ता लोग नाम मण्डाया हैं

000

केंद्रीय गृह अर सहकारिता मंत्री अमित शाह रो काल गुजरात रा गांधीनगर मांय राज्यां अर केन्द्र रा राज वाळा प्रदेशां रा सहकारिता मंत्रियां री मीटिंग री सदरत करण रो कार्यक्रम हैं ई मीटिंग मांय गांवांई हलकां री माली व्यवस्था ने मजबूत बणावण रा बारा मांय चर्चा करी जावेलां मीटिंग मांय नुवी दो लाख बहुउद्देशीय प्राथमिक कृषि सहकारी समितियां , डेयरी अर मत्स्य समितियां बणावण अर अनाज भेळो करण री दुनिया री सब ऊँ मोटी योजना ने आगे बणावण रा बारा मांय विचार व्हेवण रा आसार हैं ई सागे ई सहकारिता कानूनां मांय सुधार, डिजिटलीकरण अर सहकारी बैंकां ने मजबूत बणावण सरीखा मुद्दां माथे ई विचार व्हेवण री संभावना हैं

000

मुख्यमंत्री भजनलाल शर्मा कह्यो है के भणार्ई-लिखाई मांय तकनीक अर ज्ञान री देशी परंपरा ने बधावो दियो जावणो चाहिये वे आज जयपुर मांय अखिल भारतीय संस्थागत नेतृत्व समागम रा उद्घाटन जळसा

मांय बोल रह्या हां श्री शर्मा कह्यो के मौजूदा सरकार हाल ताई एक लाख ऊं बत्ता ओहदां माथे नौकरियां दे दीनी है अर एक लाख 54 हजार ओहदा माथे भर्ती रो काम चाल रह्यो हैं मुख्यमंत्री कह्यो के राज्य मांय मौजूदा राज मांय 351 भर्ती परीक्षावां लीरीजी, ज्यां मांय कोई पेपर लीक नी व्ह्यो

.....
जळसा मांय उपमुख्यमंत्री प्रेमचंद बैरवा कह्यो के सरकार शिक्षा मांय कौशल विकास माथे ज़ोर दे रही हैं दो दिन रा ई समागम मांय देशभर रा शिक्षक अर शिक्षाविद् भाग ले रह्या हैं

000

मुख्यमंत्री भजनलाल शर्मा आज जयपुर मांय बीकानेर अर जोधपुर संभाग रा भाजपा कार्यकर्तावां सागे बातचीत कीनीं वे कार्यकर्तावां ऊं माली साल 2026-27 रा बजट मांय जनता रा भला री योजनावां रो फायदो आखिरी छोर रा हर एक जणा ताई पूगावण बाबत् कह्यो ई दौरान सरकारी योजनावां रा बारा मांय जिलेवार कार्यकर्तावां रा सुझाव ई लिया ज्यां ई मौके पैली वाळी मुख्यमंत्री वसुंधरा राजे, भाजपा रा प्रदेशाध्यक्ष मदन राठौड़ अर केंद्रीय मंत्री अर्जुनराम मेघवाल समेत केई नेता अर जनता रा नुमाइंदा मौजूद हां

000

कृषि मंत्री डॉ. किरोड़ी लाल मीणा आज विधानसभा मांय कह्यो के प्रधानमंत्री फसल बीमा योजना मांय बीमा कंपनियां अर बैंकां री कथित गड़बड़ियां री जांच एसओजी ऊं कराई जावेलां वे बतायो के केई ज़िलां मांय फर्जी कागजात अर जाली दस्तखत रे ज़रिये बीमा क्लेम मांय गड़बड़ी रा मामला सामी आया हैं

.....
कृषि मंत्री बतायो के श्रीगंगानगर ज़िला रा करणपुर मांय सर्वेयर कानी ऊं खुद दस्तखत करण अर फसल खराबो शून्य बतावण ऊं काश्तकारां ने 128 करोड़ रुप्या रो नुकसाण व्ह्यो हैं मंत्री बतायो के सरकार हाल ताई 6 हजार 328 करोड़ रुप्या बीमा रा दावा पेटे चुकाया हैं

000

उदयपुर ऊं डूंगरपुर व्हेती थकी अहमदाबाद कने असारवा बीचे आज पहली वंदे भारत रेलगाड़ी सरु व्हीं उदयपुर रा सांसद मन्नालाल रावत अर बांसवाड़ा रा सांसद राजकुमार रोट ई गाड़ी ने हरी झंडी बता र असारवा सारु रवाना कीनीं डूंगरपुर टेशन माथे जनता रा नुमाइन्दा अर वठे रा लोग ई रेलगाड़ी रो स्वागत कीनीं ई बीचे रेलवे होळी रा त्यौहार ने ध्यान राखता थकां मुसाफिरां रा सुबीता सारु सप्ताह मांय एक दिन चालण वाळी संतरागाछी-अजमेर स्पेशल रेलगाड़ी मार्च महीना रा आखिर ताई चलावण रो फ़ैसलो कीनो हैं गुजरात रा भावनगर अर बीकानेर बीच ई 22 फरवरी ऊं नुवी साप्ताहिक स्पेशल ट्रेन चलायी जावेलां 30 मार्च ताई चालण वाळी आ गाड़ी जोधपुर, मारवाड़ जंक्शन, पाली अर नागौर टेसनां माथे ई रुकेलां

000

केंद्रीय माध्यमिक शिक्षा बोर्ड री ओर ऊं लिया जावण वाळा दसवीं अर बारहवीं कक्षा रा इम्तिहान काल सरु व्हेलां बोर्ड विद्यार्थियां ने संवारे साढे 10 बज्यां सरु व्हेवण वाळा इम्तिहान सारु 10 बज्यां ताई सेन्टर माथे पूगण सारु कह्यो हैं काल दसवीं कक्षा रो गणित अर बारहवीं रो बायोटेक्नोलॉजी विषय रो पेपर व्हेलां ई साल 46 लाख ऊं बत्ता विद्यार्थी परीक्षा देवण सारु नाम मंडाया हैं बोर्ड अब दसवीं री परीक्षा साल मांय दो बार लेवण रो फ़ैसलो कीनो हैं

000

प्रदेश मांय काल नुवा पश्चिमी विक्षोभ रा असर ऊं जयपुर अर बीकानेर संभाग मांय केई ठोड़ां बादळा मंड्या रेहवण अर कठे-कठे हल्की बिरखा रा आसार हैं मौसम केन्द्र जयपुर रा निदेशक राधेश्याम शर्मा बतायो के प्रदेश मांय तेज ठण्ड रो दौर अब लगभग खत्म व्हे गयो है, हालांकि सुबह-शाम मामूली सर्दी रो असर हैं

.....
लारला चौबीस घंटा मांय राज्य रा अधिकतम तापमान मांय बधोतरी दर्ज करीजीं घणखर ठोड़ां दिन री बगत तापमान 30 डिग्री सेल्सियस ने पार कर गयो हैं

000

पाली मांय किसानां री आमदनी बधावण अर वां रा पोषण स्तर मांय सुधार सारु वठे रा कृषि विज्ञान केंद्र मांय 'पोषण वाटिका' मॉडल विकसित करी ज्यो हैं किसान वां रा खेत रा करीब 350 वर्ग मीटर

मांय आ वाटिका लगा र पूरा साल ताजी जैविक तरकारियां री उपज ले सके हैं ई मॉडल मांय तरकारियां सागे फल अर दवाइयां रा गुणां वाळा पौधा री उपज ई शामिल हैं वाटिका सारू ज़रूरी जैविक खाद ई वां ई ठौड़ घर री सामग्री अर गोबर ऊँ तैयार करी जा सके हैं

000

सवाईमाधोपुर ज़िला मांय गंगापुर सिटी रा सरकारी कॉलेज मांय आज 'माय भारत बजट क्विज 2026' रा बारा मांय कार्यशाला राख्यी ज्यीं इण मांय प्राचार्य सुमित्रा मीना विद्यार्थियां ने बजट बणावण रा काम रा बारा मांय जाणकारी दीनी अर वां ने 'माय भारत' पोर्टल ऊँ जुडबा सारू कह्यो सवाल-जवाब री ई होड़ मांय बेहतर प्रदर्शन करण वाळां ने प्रधानमंत्री नरेन्द्र मोदी सागे बातचीत रो मौको मिल सके हैं राष्ट्रीय स्तर री आ होड़ 17 फरवरी तांई खुल हैं

000

महिला स्वयं सहायता समूहां अर महिला उद्यमियां कानी ऊँ बणायी ज्या सामान रा दरसाव अर बिक्री ने बधावो देवण रा मकसद ऊँ अजमेर मांय महिला अधिकारिता विभाग री ओर ऊँ आज फाल्गुन के रंग नारी के संग सशक्तिकरण से खुशियों की उमंग" मुद्दा माथे संभाग स्तर री अमृता हाट सरू व्हीं बाईस फरवरी तांई चालण वाळी ई हाट रो उद्घाटन केंद्रीय कृषि अर किसान कल्याण मंत्री भागीरथ चौधरी कीनों ई मौके वे मेळा मांय लगायी ज्यी स्टॉलां रो दौरा कर र महिला उद्यमियसं ससागे बातचीत कीनीं

000